

Dann ob wol durch den kläglichen Fall/ die grossen  
vnd eingeschaffenen Gaben/ von sonderlicher Weisheit  
vnd Verstandt im himlischen vnd irdischen Dingen/ in  
ihm geschwächet vnd geringert worden: So ist doch  
nach dem Fall in ihm ein gross Erkändtuis/ sonderlich in  
irdischen vnd natürlichen Dingen geblieben. Vnd weil  
Adam auß dem lustigen Paradenß gestossen/ vnd nun  
hinfürter die Erde mit sauer Arbeit erbawen sol/ vnd  
sein Brodt also suchen: Halten die Gelehrten/ daß er  
sich vmb den Berg Libano, der an beyden Seiten Eisen  
stein vnd Kupffer Erz geführet/ nider gelassen/ Sich all  
da vmbgesehen/ Eisen Bergwerck außgeschurffet/ vnd zu  
Gut gemachet/ Darvon allerley Zaum vnd Werkzeu  
ge/ das Spffer zuschlachten/ vnd den Acker zu bawen be  
reitet seyn. Wie dann vmb diese Gegend/ Cain seinen  
Bruder sol ermordet haben/ Daher die alte Stadt Da  
malcus, Das ist: Blutsack/ ihren Nahmen oberkom  
men.

Berosus schreibet auch/ das Cain solt die erste Stadt  
am Berg Libanon gebawet haben. Hier auß sehen wir/  
daß Adam der erste vnd älteste Bergmann gewesen/ der  
ohn Zweifel/ in so langen Jahren viel schöner Instru  
ment vnd Werkzeuge erfunden/ deren sich seine Kinder  
vnd Nachkommen haben wol können gebrauchen/ vnd  
weiter nachdenken.

### Cain ist der 2. Berg Herr.

Cain.

Dieser Cain oder Brudermörder/ ist der 2. Berg  
Herr gewesen/ welcher nach dem er in den Bann gethan/  
vnd auß seines Vaters Gemein verstoßen/ gab er nicht  
viel auff die Verheissung von dem Weibes Samen vnd  
ewigen Leben/ sondern als ein Weltkind/ Trachtet allein  
nach zeitlichem Gut/ belegte den Berg Libanon stattli  
cher/ dar auß er so viel Erz zuwegen gebracht/ daß er an  
diesem Ort (wie Berosus schreibet) die erste Stadt Hano  
chium gebawet. Vnd das zu dieser Zeit Bergwerck ge  
trieben/ bezeuget zum theil Josephus, welcher schreibet/  
das Cain sein Haus voller Gelds/ welches er vom Raub  
vnd Gewalt oberkame/ gesamlet vnd gemehret habe. Al  
so sind die Kinder vnd Nachkommen Cain gewaltig ge  
wesen/ vnd grosse Künstler vnd Werkmeister worden.

Diesen Cain nennen die Poeten Lycaon, vnd fabu  
liren/ daß er wegen seiner Rauberey/ in einem Wolff ver  
wandelt sey.

Der